

**Maannakkut ineqarnermut tapit pillugit malittarisassani isertitat tunngaviusarneri pinngitsoorani ilumut inunnut aningaasatigut pisariaqartitsinerpaaginnarnut atuunnersut pillugit allaaserinninnertalimmik misissuinnertalimmillu UKA2019-mi nassuiaammik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Aamma ilanngunneqassaaq init ataasiakkaat ingerlanneqarnerannut aningaasartuutit piviusut aaqquissuussinerup qularnaartarnerai. Nassuiaammi aamma ilanngunneqassapput tigussaasut siunnersuutit innersuussinerillu Akileraartarnermut Atugarissaarnermullu Ataatsimiititaliap allaaserisai ineqarnermut tapiisarnermut tunngatillugu ataqatigiissaariniarnikkut ajornartorsiutaasartut ataatsimoortumik aaqquiviginiarlugit.**  
(Inatsisartuni ilaasorta, Tillie Martinussen, Suleqatigiissitsisut)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinermit Naalakkersuisoq)

### **Siullermeerneqarnera**

Naalakkersuisut Inatsisartut aalajangiiffigisassaattut siunnersuummut saqqummiunneqartumut qujapput.

Isumaginninnermi tunniunneqartartut assigiinngitsut sunniivigeqatigiittarsinnaanerannut ajornartorsiutaasinnaasunut maluginiagaqartarnissap qanoq pingaaruteqatigissusia siunnersuummi ersersinneqarpoq.

Tunniunneqartartut arlallit appariartuaartinneqartarnerannut periuserineqartartut arlalinnik unammilligassartaqarneranut Akileraartarneq atugarissaarnerlu pillugit Isumalioqatigiissitap uparuaasimanera eqqorpoq.

Ilaatigut Akileraartarneq atugarissaarnerlu pillugit Isumalioqatigiissitap innersuussutai aallaavigalugit Inatsisartut Naalakkersuisullu ukiuni kingulliunerusuni annertuumik isumaginninnikkut aaqquissuusseqqissimapput, tassanilu ilaatigut isumaginninnikkut tunniunneqartartunut arlalinnut appariartuaartitsisarnermut malittarisassat allanngortinneqarsimapput, matumani ineqarnermut tapiissutit ilanngullugit. Tunniunneqartartut pitsaaneruumik sunniivigeqatigiittarnissaanik pilersitsinissaq pillugu anguniagaq pingaarutilik taamaaliornikkut anguneqarpoq. Taamaammallu sunniivigeqatigiittarnermi ajornartorsiutinut Akileraartarneq atugarissaarnerlu pillugit Isumalioqatigiissitap aamma aalajangiiffigisassatut siunnersuummi matumani ujartorneqartunut aaqquissutissat ineqarnermut tapiissutinut malittarisassat nutaat 1. januar 2018 atuutilersut aqutigalugit anguneqareersimasut Naalakkersuisut isumaqarput. Meeqqanut tapiissutit aamma ineqarnermut tapiissutit allanngortinnerisigut inuiaqatigiinni aningaasarsiakinnerpaat ukkatarineqarnerulerput.

Pisortanit ikiorsiissutit suliassaqarfik pillugu misissueqqissaarnermik annertuumik Naalakkersuisut aammattaaq aallartitsipput.

Nalinginnaasumik suliffeqarfeqarfimmi sulineq pisortanillu ikiorsiissuteqartitsineq imminut sunniivigeqatigiittarnersut, ilaatigullu innuttaasut pisortanit ikiorsiissutinik pisartut, suliffeqarfeqarfimmut uteqqinnissaat aqqissuussinerup naammattumik kingunerisarneraa misissueqqissaarnermi misissorneqassasoq pingaarnertut siunertarineqarpoq. Misissueqqissaarnermittaaq tunniunneqartartunut allanut sunniivigeqatigiittoqartarnersoq misissorneqassaaq, matumani assersuutigalugu ineqarnermut tapiissutinut, meeqqanut tapiissutinut aamma suliffeerunnermi ikiorsiissutinut naleqqiullugit.

Taamaammat ineqarnermut tapiissutit innuttaasunut aningaasaqarnikkut pisariaqartitsinerpaanut sammititaanersut paasiniaaffigissallugu pisariaqartinneqanngitsoq Naalakkersuisut isumaqarput.

Taamatut oqaaseqarlutik Naalakkersuisut inassutigaat siunnersuut itigartitsissutigineqassasoq.